

Ko nga whakamarama o te waiata nei kei te ngaro. Ma nga tangata e marama ana e tuku mai.

(Ref: M. 237 & 416, S. 39 & 109 & 180, T. Turi p. 21, B. 3/28.)

Tera Tariao<sup>1</sup> ka moiri ki runga.  
Na runga ana mai te utu<sup>2</sup> ki Rangiao<sup>3</sup>.  
Te ngakau haere whakakuru tahi tonu.  
No nui o rangi ra te mahara i raru ai;  
Na te kamo anake tana ngongi<sup>4</sup> hua noa;  
Koia tenei hanga e wairutu noa nei,  
Aroha i mahuki ki te makau i te rangi.  
Kati na. e Awa, te mahi te haramai,  
'Mea nei te kiri ka tauwehe ko tawhiti.  
Whamamao rawa, te ripa tauarai  
Ki to tai whenua kei hoki atu te "ingoingo."  
I maringi a wai te taru nei a te toto, ka whakina  
ki waho;  
Mei ahatia koe i pakaru mai ai?  
Werohia pea te kopere<sup>5</sup> tupua  
Nau e Tauwhare<sup>6</sup>, ka wheoro ki te rae  
O Taumata-maire; mei kai kanohi kau  
Taku nei titiro ko koe nei, e Te Heka<sup>7</sup>.  
Wairua e tu kei<sup>8</sup> te hohoki mai.  
Ka pa ia nei ko te puna i rukuruku<sup>9</sup>;  
Waka kua pakaru ka eke au i te *hipi*<sup>10</sup>,  
Puke ki Oihi<sup>11</sup>, kei hoki mai te manako, i.

Takiri ko te ata kia korihia te manu;  
Mataotao noa te tautanga iho.  
Kei whea ko te tau i rangia e au?  
'Ra ka tuku atu ki te kiri e kakara.  
Nau<sup>12</sup>, e hine, i toko kia mamao.  
Waiho ki te tinana ko te toiki<sup>13</sup> kapara.  
E tu ki te ngahere o te Tipi kei tua.  
Awhea e Tua tuku ai te tere,  
Hei pere ki te tai o Hauraki i tua?  
'A tomokia atu te whare o Tiaho<sup>14</sup>.  
Tau kei a Oke<sup>15</sup> kei riro noa mai.  
Aha i riri ai? Mau ano te tinana, i.

E to e te ra, rehurehu ki te rua;  
Taua e haere kia tauaraitia  
Te kiri i awhi ai maua ko te hoa.  
Ka iri au, e, i te kiri o te ngutu.  
Heoi ra-mota<sup>16</sup> i matea iho ai,  
Ka tauaki ki waho a taua nei mahi.  
Me rehu-a-ngongi<sup>17</sup> te hua i aku kamo,  
Te aroha ra, e, o te hoa ka wehe;  
'Ia nei e paka<sup>18</sup> tau-ohi tonu koe.  
He waka pakaru au, e taea te aukaha, i.